

四庫全書

集部

欽定四庫全書

宋詩紀事卷六十三

錢塘厲鶚撰

黃 榦

榦字直卿號勉齋閩縣人受業朱子之門以子  
妻之寧宗朝補將仕郎歷知漢陽軍主管武夷  
沖祐觀復知安慶府主管亳州明道宮致仕卒  
謚文肅有集

答曾伯玉借長編

白露下百草迅商薄秋林幽人起長歎感此節物深攬  
衣自徘徊撫劍還悲吟丈夫各有志莫作兒女心涉遠  
當疾趨畏影須就陰願言理輕車去上南山岑

訪高簽判故居

遠樹分高下平洲接有無短亭低密竹小艇隱寒蘆轉  
浪魚深入斜陽鷓鴣亂呼自慚貴公子未老賦歸歎

侍文公飲浮翠亭用劉叔通韻

涼風振幽壑陰雲翳前山高情屬清秋適意林莽間煙

橫萬家井水淨雙溪灣徙倚暮忘歸人境相與閑遊子  
獨何為千里方言還陪此杖屨遊忘彼道路艱心期更  
他日依巖結柴關

過翠微

古寺殘僧少孤村碧樹圓明朝山下路愁絕望煙歸

以上

勉齋集

陳淳

淳字安卿龍溪人受業朱子之門嘉定中以特

奏恩授安溪簿有北溪字義

題江郎廟

三石參天作柱擎自從開闢便崢嶸何為末俗好奇怪  
盡道江郎魄化成

四朝詩

輔廣

廣字漢卿號潛齋父達本河朔人南渡居秀州  
之崇德縣從呂成公遊後登朱子之門自祠官  
歸隱以著書為己任有六經注釋四書問答等

藏於家

題資福院平綠軒

名區與利隴羊腸盡攀躋誰能為芳草四曠成幽棲春  
風一憑闌秀色無高低山遙不作障水近何妨堤只恐  
金氣寒黃枯變碧萋坐令羣目驚有似七聖迷人心無  
天游六鑿相攘擠但于平處觀衆有何端倪日月互賓  
送景物隨乖睽彼昏如執著惟君試金篋

至元嘉禾志

蔡元定

元定字季通建陽人從朱子游尤表揚萬里薦  
於朝以疾辭韓侂胄設偽學之禁為言者所詆  
謫道州卒後贈迪功郎賜諡文節學者尊之曰  
西山先生

自勵詩

數間茅屋環流水布被藜羹飽暖餘不在利中生計較  
肯于名上著功夫窗前野馬閒來往天際浮雲自卷舒  
窮達始知皆有命不妨隨分老樵漁

武夷山志

蔡淵

淵字伯靜號節齋元定長子

仲弟未歸歲晚有懷

明月照席寒生我愁百端冉冉歲云徂游人不顧還相  
送荷花碧相望楓葉丹高樓日千回散步東林隈攀條  
復攬秀日暮空徘徊金杯白玉臺猶能對寒梅寄書豈  
不早三月千里道敢怨歸軒遲但念堂中老春風萱草

生更樹堂前庭

詩家鼎鑪



蔡沈

沈字仲默元定子少游朱子之門從父謫道州  
護喪還隱居九峰卒諡文正

遊西山

柴荆相依倚綠篠自蒙密秋蘭澗中花山果路邊實沿  
岡引霜藤臨流坐寒石日暮陰崖開雲收遠山出疎籬  
尚存菊荒庭舊垂橘絲桐想虛堂簡策見靜室俯仰今  
幾時漫然已陳迹摩挲蒼苔痕屐齒不可識

建寧府志

贈琴士翁明遠

膠漆本無意絲桐非有情因緣醉翁指發此無窮聲蕭  
蕭秋風引葉落渭水濱喧喧陽春歌花明錦江城離鸞  
月徊徊別鶴雲冥冥清冷灑毛髮震蕩驚雷霆曲度神  
莫測調高妙難名時方多艱虞掩耳誰為聽無為恩怨  
兒女語敵場勇士軒昂行

詩家鼎鑪

武夷山天柱峰

才既非時用性本愛岑寂決策名山游幽隱遂成癖春

風百花紅秋月千嶂碧煙霞結綢繆猿鳥自疇昔垂閒  
撫深曠噴薄鳴鐵笛笑挹天柱峰高寒幾千尺

大隱屏

昔余隱屏東扁舟夾雙龍浩歌碧雲裏萬壑生清風羣  
仙幔亭宴玉女雙鬢蓬夕景落寒巖照耀金芙蓉

昔余隱屏北飄然度巖側誰知神仙居自與塵世隔瑤  
草冬更青琪花雪爭白橫玉吹寒空萬里天一色

以上  
武夷

山志

章才邵

才邵字希古崇安人以父蔭補官嘗守臨賀辰陽晚歲與朱子游世稱為篤實君子

過清遠峽

崑頭風急樹敲斜溪畔漁樵十數家老盡往來名利客  
年年秋水映蘆花

錦繡萬花谷

釣臺

短櫂夷猶七里灘人亡依舊水光寒漢家名節君知否

盡在君家一釣竿

釣臺集

劉子寰

子寰字圻父號篁嶸建陽人居麻沙早登朱文公之門有篁嶸集

杜若

欽州五月土如炊滿山杜若芳菲菲素英綠葉紛可喜  
勁烈不避炎歊威採之盈掬薦蔬食臧獲失笑庖人譏  
君不見屈平夕餐賦秋菊魂兮無南盍來歸又不見坡

公服食得臬耳扣角自嘆從前非伊子假祿二十石窮  
比二子猶庶幾滄花嚼藥有真樂一飽何必謀甘肥尚  
餘升合漬生蜜從他薏苡生珠璣

全芳備祖

### 金鳳花

天霜凋九陵梧桐日枯槁鳳德何其哀驚飛下幽草九  
苞空髣髴衆彩各自好黃中獨含章見晚更傾倒託根  
慢亭峰弱質深自保便翾金翅短淡泊乃幾道俗眼迷  
是非人間跡如掃

合璧事類別集

劉炎

炎字潛夫號撓堂學於朱子

王剛仲惠詩醉筆聊和

君不見山澤之癯蒙野服如彼隰桑還自沃又不見侯  
門公子貴且驕飽豢膏粱猶未足人生貴賤不難分唯  
有聖賢無等倫朝為塗人暮為禹窮崖斷壑看回春君  
方妙齡戢不住萬里飛黃又騰去王良造父不得施耳  
側風聲未為遽我思古人愛其宇青蘋堂兮杜若廡芰

荷可裳菊可餐肯介纖埃與塵土是中非聲亦非色安  
得與君一憑軾鵬鵬變化不可量要指天地為一息悠  
悠此道誰能將從知可玩不可望慎勿隨風學飄絮春  
光駘蕩成飛揚

濂洛風雅

### 楊與立

與立字子權浦城人受業朱子之門嘗知遂昌  
縣因家蘭谿學者稱船山先生

### 幽居



柴門閒寂少人過  
盡日觀書口自哦  
餘地不妨栽竹木  
放教啼鳥往來多

潓洛風雅

林用中

用中字擇之號東屏古田人從遊朱晦庵之門  
偶偕晦翁走潭州訪守張敬夫因有南嶽之游  
著倡酬詩百四十餘首

敬夫用晦翁定王臺韻賦詩同次韻

寂寞番君後光華帝子來  
千年餘故國萬事只空臺  
日

月東西見湖山表裏開從知爽鳩樂莫作雍門哀

後洞山口晚賦

西嶺更西路雲嵐最窈深水流千澗底樹合四時陰幽絕無僧住閒來有客吟山行三十里鐘磬忽傳心

贈上封諸老

上封臺觀靜夕霽景偏清月下聞禪語風中有磬聲龍池留古跡鴈塔寄餘情借問房前樹東窗忽偃生

以上南嶽

倡酬集

方士繇

士繇字伯謨號遠菴莆田人豐之之子從朱子游稱高弟有集

昇山即事

一徑西風裏閒房客未歸砌苔侵野屐林葉上秋衣黃  
卷經心嬾青綸入夢稀還書報妻子莫厭故山薇

詩林萬選

崇安分水道中

溪流清淺路橫斜日暮牛羊自識家梅葉陰陰桃李盡

春光已到白桐花

詩家鼎鑪

武夷山

丹崖石氣凝高秋，碧溪上引天河流。  
金堂石室不可到，玉棺莓苔生古愁。  
仙人昔乘紫雲去，白馬搖鞭在何處。  
茫茫塵世那得知，幔亭空記當年事。  
君不見茂陵松柏已蕭疎，乾魚猶祭同亭祠。

莆陽文獻

章康

康字季思，浦城人。居吳隱居，不仕。人稱曰聘君。

從學於朱晦菴淳祐中卒有集

破山寺

名山久相望今日為著屐到寺第一義古松足蟠屈一  
一龍蛇形風雷氣蕭瑟瓔珞檜兩株皆數百年物佛燈  
耿青熒像設暗金碧雲廊極徘徊老屋共崢兀僧房小  
盤薄西原訪泉石于其最幽絕似可便築室因而思古  
人多有愛山癖要之亦何為一賞事已畢上方不及登  
尚或俟他日無非會心處妙同箭鋒直山靈謂何如移

文茲不必作詩留山中併可告來轍

破山寺志

程先

先字傳之休寧人與子永奇俱從朱子學有東

隱集

和人感秋韻

疾風拔枯楠天作破瓦色古殿無飛塵過者見瑟瑟

秋風

憶昔遊吳甸新知結項容松江楓落後貌得洞庭峰

秋山

新安文獻志

程永奇

永奇字次卿新安人嘗登朱子之門有格齋集

題耕隱卷

山下巢雲夢亦清隴頭耕雨綠蓑輕時人共指龐居士

為借農書一到城

新安文獻志

劉淮

淮字叔通號溪翁建陽人朱文公之高弟

朱子跋云叔通之詩不為雕刻纂組之工而平易從容不費力處乃有餘味

韓家府

嘉定初作

寶蓮山下韓家府鬱鬱沈沈深幾許主人飛頭去和虜  
綠戶雕牆鎖風雨九世卿家一朝覆太師之誅魏公辱  
後車不信有前車突兀眼前看此屋

四朝聞見錄韓侂冑居太廟三茅之旁後山為  
閔古堂為閔古泉舊名青衣有青衣童見泉上  
故名為流觴曲水泉自青衣下注于池凡有十  
二折旁砌以瑪瑙泉流而下滴于閔古堂渾涵  
數畝有桃坡十有二級夜宴則殿巖用紅燈數  
百出于桃坡之後以燭之其雲巖之最奇者曰  
雲岫侂冑居之既久歲累月積剔奇扶勝窈窕  
渟深疑為洞天福地之居不類其為在天衢咫



尺舊皆寧壽觀中也韓敗有旨盡給還寧壽  
復為禁地建陽劉淮賦詩云云

平遠臺

海天漠漠水雲寬開到梨花正自寒卻擁重裘上平遠

愁心千疊倚闌干

詩家鼎鑪

劉仙倫

仙倫一名儼字叔儼廬陵人有招山小集

得蟹無酒

水鄉秋晚得白蟹望斷碧雲無酒家此意淒涼何所似

淵明醒眼對黃花

西林

路入廬陵西復西  
翠煙深處著招提  
山僧幾輩雪垂領  
水鳥數聲雲滿溪  
莫對青山談世事  
且循粉壁看留題  
禪房夜臥衣裳冷  
夢破鐘聲落月低

盱江驛舍中有婦人書一憶字筆勢頗姿媚游子  
明王相之皆題詩其後率予同賦

陽臺雨歇行雲杳  
天闊鴻稀春悄悄  
鷓鴣孤眠怨芳草

夜夜相思何日了  
妾非無聲不敢啼  
妾非無淚不敢垂  
柔情欺損青黛眉  
夢魂暗逐胡蝶飛  
春風著人鎖窗綠  
綠窗書字寄心曲  
細看香翰婉且柔  
中有閒愁三萬斛  
向隅棄筆惆悵時  
此情默默誰得知  
無緣相見空相憶  
不如當日休相識

以騎驢鍾馗送秦先之

髯翁矍鑠老據鞍  
曾入大內見阿瞞  
幞頭垂腳藍綬敝  
不知班簿為何官  
天寒歲晚日云暮  
霜風吹驢耳卓豎

老臧負笠衣裳單反袂掩目趾穿屨華門我恐難留君  
收卷送似秦將軍將軍文事有武備眉骨自是凌烟人  
汝當訶護謹厥職勿但縮頭徒挂壁將軍來歲在殿巖  
豐汝牲醪作除夕

贈岳周伯

昔年搥鼓事邊庭公相身為國重輕四海幾人思武穆  
百年今日見儀刑筆頭風月三千字齒頰冰霜十萬兵  
天亦知人有遺恨定應分付與中興

題岳陽樓

八月書空鴈字聯  
岳陽樓上俯晴川  
水聲軒帝釣天樂  
山色玉皇香案煙  
大舶駕風來島外  
孤雲銜日落吟邊  
東南無此登臨地  
遣我飄飄意欲仙

以上招山小集

岳珂程史云余兄周伯喜誦之

劉植

植字成道永嘉人號漁屋安上曾孫

過彭澤

井邑已非舊柴桑里尚存春風三畝宅落日數家村隔  
樹聞鷄犬編民半子孫頽然孤隴上寒菊遶松根

東甌詩集

劉翰

翰字武子長沙人吳雲壑居父之客有小山集

翠屏曲

小亭簾幕垂陰陰梅香入枕春生屏西窗月落翠被冷  
鳥聲殘夢東風醒三年不喚清溪渡夢裏灤西春水路  
江頭女兒雙翠眉能唱劉郎芳草句

種梅

淒涼池館欲棲鴉  
彩筆無心賦落霞  
惆悵後庭風味薄  
自鉏明月種梅花

石頭城

離離芳草滿吳宮  
綠到臺城舊苑東  
一夜空江煙水冷  
石頭明月鴈聲中

鴻門宴

江東遙遙八千騎  
大戰小戰七十二  
劉郎曉鞭天馬來

蹴踏長安開帝里子嬰已降隆準公君王置酒鴻門東  
張良已去玉斗碎三月火照咸陽紅繡衣歸來日將夜  
可惜雄心天不借當時已失范增謀尚引長戈到垓下  
刁斗乍急營壘驚夜深旗尾秋風橫玉帳佳人不成夢  
月明四面聞歌聲拔劍相看淚如雨我作楚歌君楚舞  
明朝寶馬一聲嘶江北江東皆漢土

吳門行

吳歌婉婉清如水西風曉自閶門起雙橈艇子采菱來



翠苻綠蘋香十里芙蓉影落已知秋  
濺溼羅衣眉黛愁  
回身蕩槳入門去明月家家秋水流

立秋日

乳鴉啼散玉屏空一枕新涼一扇風  
睡起秋風無覓處  
滿街梧葉月明中

客去

送客歸來月滿簷梅花微笑隔疎簾  
酒醒今夜銀屏冷  
沈水熏爐旋旋添

以上小山集

劉應時

應時字良佐慈溪人有頤菴集

旅舍

草市欲黃昏吾行恰到門僕夫思憩息燈火喜溫存一  
夜催花雨數家臨水村征途雖得句默坐與誰論

早行

登輿睡思尚昏昏斗柄衡山月在門鷄犬未鳴潮半落  
草蟲聲在豆花村

曹直夫水石短軸

奔流出峽響如雷  
筆力浮天亦壯哉  
吳蜀興亡千古恨  
白鷗時逐浪花來

雪夜

迎春寒色愈嚴凝  
小閣爐殘冷欲冰  
寂寞黃昏愁吊影  
雪窗怕上短檠燈

以上頤菴集

李翔高

翔高號羽軒

句

春愁自是無重數又被東風揭繡簾

貴耳集李羽軒善為絕句盧蒲江甚愛之有句云云老子興不淺也

劉學箕

學箕字習之屏山先生子翬之孫七者翁珙之

子有方是閒居士小稿

劉叔通云居士詩摩香山之壘詞拍稼軒之肩

不如歸去

禽言

不如歸去愁綠怨紅春欲暮汝勸行人歸行人勸汝住  
鳴聲不住良苦辛啼得血流無用處不如歸去吾今歸  
千聲萬聲爾何為

環洲江氏園

欲覽環洲勝維舟步石磯踏青隨野色穿翠任春霏地  
迴知山遠村灣覺水園東風輕薄甚桃李亂荆扉

以上方是

聞居士小稿

武衍

衍字朝宗汴人有適安藏拙餘稿

方惠岳跋云東坡見齊安朱廣文小詩云官閒  
廳事冷胡蝶上堦飛謂其可入畫圖適安此卷  
絕句摹寫景物吟詠情致多有可筆於丹青者  
惜不過坡之品題

宮詞補遺

牡丹春籞正穠華有旨今年不賞花  
翦落金槃三百朶  
內批分賜近臣家

開元廣寒詞

桂華珠殿水精樓  
柘袖籠香乙夜遊  
飛下銀橋人不覺

月明三十六宮秋

聞角呈宗諭方蕙巖

曉角吹愁客夢寒一聲聲落畫屏間  
吳兒可殺無風味  
老卻梅花只當閒

柳枝詞

靈和殿裏最風流三月飛花滿御樓  
換得玉人眉樣巧  
一春渾不下簾鉤

秋夕清汎

弄月吹簫過石湖  
冷香搖蕩碧芙蕖  
貪尋舊日鷗邊宿  
露溼船頭數軸書

春日湖上

飛鷁鳴鑼鼓吹喧  
繁華應勝渡江前  
吟梅處士今還在  
肯住孤山爾許年

長橋月夕

捲來滄海黃銀浪  
飛出層雲白玉團  
千古垂虹奇絕處  
獨憑三百赤闌干



老宮人

侍輦看花上苑春  
太皇宣索鳳笙頻  
如今猶記當時曲  
對譜閒教小內人

寶髻無光玉貌昏  
銜悲空感舊承恩  
君王愛問先朝事  
時許車兒到殿門

湖亭席上贈商素

一曲春風已擅場  
淺顰低嚬更傳觴  
令人憶殺香山老  
舊日玲瓏也姓商

貴游

鈿車轆轤碾芳塵步障香移一片春花下玉盤行禁巒  
御前宣勸到湖濱

清明湖上

榆火初傳禁漏殘滿城和氣在湖山接天楊柳風煙裏  
照水桃花圖畫間舊路人穿新路去長橋船出斷橋還  
吾皇應喜民胥樂歲許西門入夜關

飲湖亭

寒食梨花月新晴楊柳風愁消山色裏興極酒杯中綠  
髮日夜變青春今古同忍教行樂地容易夕陽紅

以上  
通安

藏拙餘橐

戴敏

敏字敏才號東皋子台州黃巖人石屏之父有

東皋集

小園

小園無事日徘徊頻報家僮送酒來惜樹不磨脩月斧

愛花須築避風臺引些渠水添池滿移箇柴門傍竹開  
多謝有情雙白鷺暫時飛去又飛回

初夏遊張園

乳鴨池塘水淺深梅天氣半晴陰東園載酒西園醉  
摘盡枇杷一樹金

以上東舉集

句

人行躑躅紅邊路日落秭規啼處山

劉後村詩話

桑世昌

世昌字澤卿淮海人居天台陸放翁諸甥著蘭亭博議回文類集莫菴詩集

句

翠添鄰塹竹紅照屋山花

葉水心題跋君詩尤工其即事句益著色盡也

王大受

大受字仲可鄱陽人有拙齋詩集

四朝聞見錄水心先生葉適題王大受拙齋詩稿云紹熙四年光宗疾不能朝重華諫者傾朝

謗者盈市憲聖后兄子琚最賢大受因琚奏孝  
宗陛下惟一子不審處利害忠國人騰口取名  
於家計大不便且羣臣以父子禮故諍不敢止  
陛下何不出手詔云皇帝體不安朕所深知卿  
且勿言須秋涼朕自擇日與皇帝相見也孝宗  
喜其策會宴駕不果用攻媿樓公憤其前與族  
兄鏞有間且毀其文力言之于史相期以必竄  
大受史遂命去大受袍笏編置邵武琚之子鋼  
以稿上于朝而削大受姓名

### 遊鹿苑寺

驚峰遊屐少我獨住多時僧護翻經石猿攀礙月枝地  
寒春到晚山遠夢歸遲尚被浮名誤吾心信自癡

詩林  
萬選

水樂洞

歷騁寒空六六天更來洗耳聽春泉  
湍激石浮清磬樹溜行沙寫素弦  
路口林亭三四面洞中日月幾千年  
何人獨得開收律譜入宮商與世傳

咸淳臨安志

句

君不見牛奇章與李衛公  
二人平生不相容  
門前冠蓋互咿軋  
惟有愛石心則同

題李季章石林四朝聞見錄

徐照

照字道暉一字靈暉號山民永嘉人有芳蘭軒

集四靈之一

葉水心誌徐山民墓云山民有詩數百琢思尤  
奇皆橫絕歎起冰懸雪跨使讀者變踣慘慄肯  
首吟歎不能自己然無異語皆人所知也人不  
能道爾

文獻通考陳氏云徐照徐璣翁卷趙師秀四人  
號永嘉四靈皆晚唐體也惟師秀嘗登科改官

亦不顯  
趙東閣汝回云唐風不競派沿江西永嘉四靈

乃始以開元元和作者自期治擇淬鍊字字玉  
響雜之姚賈中人不能辨也

梅磻詩話永嘉徐照題子陵釣臺詩云梅福神  
仙者新知是婦翁子陵為梅公壻傳記不載詩



必有所本

石門瀑布

一派從天下曾經李白看千年流不盡六月地常寒灑  
木跳微沫衝崖作怒湍人言深碧處常有老龍盤

江心寺

兩寺今為一僧多外國人流來天際水截斷世間塵  
宿腥林徑龍歸損塔輪卻疑成片石曾坐謝公身

楊柳

嫩葉因風不自持  
淺黃微綠映清池  
玉人未識分離苦  
折向堂前學畫眉

贈徐璣

一舸寒江上梅花共別離  
不來相送處愁有獨歸時  
去夢千峯遠為官三歲期  
思君何可見新集見君詩

題桃花夫人廟

一樹桃花發桃花即是君  
空祠臨野水何處覓行雲  
事迹樵人說爐香過客焚  
雨添碑上蘚難讀古詩文

以上芳蘭

軒集

徐璣

璣字文淵一字致中號靈淵永嘉人官長泰令  
有泉山集二薇亭集四靈之二

初夏遊謝公巖

又取紗衣換天時起細風清陰花落後長日鳥啼中水  
國乘舟樂巖扉有路通州民多到此猶自憶髯公

吾廬

蓬戶閉還開深居稱不才移荷憐故土買石帶新苔藥  
信仙方服衣從古樣裁本無官可棄何用賦歸來

投楊誠齋

名高身又貴自住小村深清得門如水貧惟帶有金養  
生非藥餌常語是規箴四海為儒者相逢問信音

以上  
二藏

亭集

翁卷

卷字續古一字靈舒永嘉人有西巖集藁碧軒

集四靈之三

寄遠

秋氣日淒清秋衣殊未成在家猶不樂行路若為情幾處看山色暮天聞雁聲思君有幽夢夜夜出江城

石門菴

山到極深處石門為洞名嵐蒸空壁壞雪映小齋清果落羣猿拾林昏一虎行山僧何所得高坐若無情

冬日登富覽亭

未委海潮水往來何不閒輕烟分近郭積雪蓋遙山漁  
舸汀鴻外僧廊島樹間晚寒難獨立吟竟小詩還

夢回

一枕莊生夢回來日未衙自煎沙井水更煮岳僧茶宿  
雨消花氣驚雷長荻芽故山滄海角遙念在春華

以上  
葦碧

軒集

野望

一天秋色冷晴灣無數峯巒遠近間自上山來看野水

卻於水底見青山

詩家鼎鑪

句

梅花分地落井氣隔簾生

曉對

十年流不盡六月地常寒

瀑布

一階春草碧幾片落花輕

春日

分石同僧坐看松見鶴

來

遊寺

移花連舊土買石帶新苔

吾廬

貴耳集

鶚按四靈詩派中趙紫芝師秀號靈秀入宗室

戴復古

復古字式之號石屏嘗登陸放翁之門以詩鳴

江湖間有石屏集

姚雪蓬跋式之詩天然不費斧鑿處大似高三十五輩晚唐諸子當讓一面

方萬里跋石屏詩清健輕快自成一家

瞿佑歸田詩話戴式之嘗見夕照映山峯巒重疊得句云夕陽山外山自以為奇欲以塵世夢中夢對之而不愜意後行村中春雨方霽行潦縱橫得春水渡傍渡之句以對上下始相稱然須實歷此境方見其奇妙

湘中遇翁靈舒

天台山與雁山鄰只隔中間一片雲  
一片雲邊不相識  
三十里外卻逢君



白紵歌

雪為緯玉為經一織三滌手織成一片冰清如夷齊可  
以為衣陟彼西山于以采薇

思家

用后山韻

湖海三年客妻孥四壁居飢寒應不免疾病又何如日  
夜思歸切平生作計踈愁來仍酒醒不忍讀家書

淮村兵後

小桃無主自開花烟草茫茫帶晚鴉幾處敗垣圍故井

向來一一是人

題釣臺

萬事無心一釣竿  
三公不換此江山  
平生誤識劉文叔  
惹起虛名滿世間

娛書堂詩話嚴子陵釣臺題詠尚矣天台戴式之一絕亦新意可喜

新安寒食

不擬今年到歙州  
要知行止豈人謀  
一百五日客懷惡  
三十六峯春雨愁  
老矣此身猶道路  
淒其歸夢遶松楸

花瓢仙子無由見千里江山負遠遊

遊九鎖

天柱峯頭一振衣雲開巖路雨晴時登臨欲訪神仙事  
紀實都無漢晉碑拍手數聲龍井躍篝燈一覽洞天奇  
林間安得棲身處欲煉金丹餌玉芝

毘陵天慶觀畫龍呈王使君

姑蘇道士天酒星醉筆寫出雙龍形墨蹟縱橫奪造化  
蜿蜒滿壁令人驚一龍翻身出雲表口吞八極滄溟小

手弄寶珠珠欲飛握手掌中拳五爪一龍排山山為開  
頭角與石爭崔嵬波濤怒起接雲氣不向九霄行雨來  
萬物焦枯天作旱兩龍壁隱寧非嬾真龍不用只畫圖  
猛拍欄干寄三歎

烏鹽角行

鳳簫鼉鼓龍鬚笛夜宴華堂醉春色豔歌妙舞蕩人心  
但有歡娛別無益何如村落捲桐吹能使時人知稼穡  
村南村北聲相續青郊雨後耕黃犢一聲催得大麥黃

一聲喚得新秧綠人言此角只兒戲孰識古人吹角意  
田家作勞多怨咨故遣聲音召和氣吹此角起東作吹  
此角田家樂此角上與鄒子之律同宮商合鍾呂形甚  
朴聲甚古一吹寒谷生禾黍

袁州化成巖李衛公謫居之地

一巖端坐挹千峯三兩亭臺勝槩中江水驟生連夜雨  
松聲吹下半年風因思世故吾頭白獨步林皋夕照紅  
欲吐草茅憂國志誰能喚起贊皇公

括蒼石門瀑布

少泊石門觀瀑布明知是水卻疑非  
亂拋玉雪從天下散作雲烟到地飛  
夜聽蕭蕭洗塵夢風吹細細溼人衣  
謝公蠟屐經行處聞有留題在翠微

以上石屏集

句

詩談天下事愁到酒樽前

秋懷

鶯啼花雨歇燕立柳風微

晚春詩骨梅花瘦歸心江水流

歲暮

客愁茅店雨詩思柳橋

春

春日

黃花一杯酒白髮幾重陽

九日

以上貴耳集

馮取洽

取洽字熙之號雙溪翁延平人

送劉篁嶠

來似孤雲出岫閒去如高月耿難攀若為化作修修竹  
長伴先生篁嶠山

詩人玉屑

自題交游風月樓

平揖雙峯俯霽虹近窺喬木欲相雄一溪流水一溪月  
八面疎櫺八面風取用自然無盡藏高寒如在太虛空

落成恰值三秋半為我吹開白兔宮

詩人玉屑一溪流水一聯詩林皆以為秀傑之句

劉正之

正之字子正臨江人

送別趙紫芝

夫君落落天馬姿聲名早與賀白馳錦囊千首不療飢  
非詩窮人窮乃奇憶昔聞君未識面獨傳句法誇清健  
竭來白下一相逢蓋論心曾幾見劃然起柁春江流



我亦江頭尋去舟人生相聚會有別江水江花無盡愁  
萬事不如歸去好石田茅屋生春草如君自是玉堂仙  
輕車緩轡長安道春日遲遲柳依依攀柔條兮送君歸  
翰墨大全

上官良史

良史字偉長號閬風山人

尋巖丹丘東潭居二首

愛子東溪幽抱被來同宿山家無膏火然薪代明燭閒

窗何所有古書三五束鳥棲月上時還見簷前竹

山齋櫺牖疎水月連春霧今夕定何夕清心忻所遇如  
從天姥游似得招提趣幽夢出雲時怱怱山鳥曙

河梁值雨有懷嚴羽

葦岸逢殘雨河橋對暮流倚鞭一悵望客思暫夷猶楓  
葉滿江色夕陽終古愁遙憐君亦苦不共故園秋

以上詩家

鼎嚮

晚泊

渺渺復迢迢  
楓林帶野橋  
沙寒初上月  
浦暗已回潮  
霜葦多先折  
江花或後凋  
今宵何處雁  
相伴宿蘭橈

後村千家

詩

蘇洞

洞字召叟  
山陰人  
丞相頌四世孫  
有冷然齋集  
除夕呈主人

臘節梅花外  
椒盤淚眼邊  
山川非故國  
笳鼓咽新年  
機事鷗偏覺  
家書雁不傳  
細箋今夕恨  
萬一故人憐

錢塘渡

百年鬢髮春風晚十二闌干落照微多事錢塘江上水

送人離別送人歸

以上詩林萬選

金陵

朱雀街頭觀闕紅角門東畔是春風人家一樣垂楊柳

種入宮牆自不同

詩家鼎鑪

嚴羽

羽字丹丘一字儀卿邵武人自號滄浪逋客有

滄浪吟

滄浪詩話論詩如論禪漢魏晉與盛唐之詩則第一義也大歷以還之詩則小乘禪也晚唐之詩則聲聞辟支果也盛唐諸人惟在興趣羚羊挂角無跡可求故其妙處透徹玲瓏不可湊泊如空中之音相中之色水中之月鏡中之象言有盡而意無窮近代諸公乃作奇特解會遂以文字為詩以才學為詩以議論為詩夫豈不工終非古人之詩也蓋於一唱三歎之音有所歉焉國初之詩尚沿襲唐人王黃州學白樂天楊文公劉中山學李商隱盛文肅學韋蘇州歐陽公學韓退之古詩梅聖俞學唐人平澹處至東坡山谷始自出己意以為詩唐人之風變矣山谷用工尤為深刻其後法席盛行海內稱為江西宗派近世趙紫芝翁靈舒輩獨喜賈島姚合

之詩稍稍復就清苦之氣江湖詩人多效其體  
一時自謂之唐宗不知止入聲聞辟支之果豈  
盛唐諸公大乘正法眼者哉

答友人

湘江南去少人行瘴雨蠻烟白草生誰念梁園舊詞客  
枕榔樹下獨聞鶯

閨怨

昨夜中秋月含愁顧影頻空留可憐影不見可憐人

懊儂歌

君子如白日願得垂末光妾心如螢火安得久照郎  
船在下江口逆風不得上結束作男兒與郎牽百丈  
朝亦出門啼暮亦出門啼蛛網挂風裏搖思無定時

喜友人相訪擬韋蘇州

朝朝竹林院閉戶讀殘書几閣晨風入荒郊寒露餘故  
人步履至清坐喜踟躕輟卷還留興漱泉同飯蔬

霏雪錄嚴滄浪之于詩刻意古作卓然不為流俗所染五言如閨怨等云云

廬陵客館雨霽登樓言懷寄友

終日坐兀兀邈然無少欣登樓一周覽始見萬山羣微  
雨洗殘暑青天卷浮雲襟懷兩廓落朗若見夫君見君  
君何在顧影還獨笑吏非金門游隱異滄浪調江明秋  
月白山空夜援嘯徒事百卷文未返一竿釣留滯豈勝  
愁非君誰與謀水寒終赴海鴈遠暫賓秋舉世不可語  
猶當傲巢由贈君三尺劒永駕五湖舟

山居即事

稍欣入林深已覺煩慮屏霜果垂秋山歸禽度風嶺紛



紛葉易積漠漠雲欲盛  
礪戶寂無人松蘿窅然暝  
唯聞山鳥啼月上柴門靜  
終歲寡持醪延歡聊煮茗  
羣書北窗下帙亂誰能整

還山吟畱別城南諸公

日暮望寒山悵然歸思發  
如何山中客屢看城頭月  
城頭月明女蘿秋石磴潺湲寫碧流  
巖援久別應惆悵澗鳥相呼亦共愁  
城南故人與我好令我忘卻歸山道  
昨夜西風夢到家忽驚千嶂芝花老  
朝來舟子促辭君回

首空江語尚聞別後莫嗟難見面相思只望嶺頭雲

懷南昌舊游

昨在南昌府清遊不可窮  
杯行江色裏棹進月明中  
樓笛吹晴雪菱歌漾晚風  
坐來懷舊迹萬里亦飄蓬

訪益上人蘭若

獨尋青蓮宇行過白沙灘  
一徑入松雪數峯生暮寒  
山僧喜客至林閣供人看  
吟罷拂衣去鐘聲雲外殘

客中別劉表叔季高

悠悠遠別半生悲  
白日相逢又語離  
海內風塵驚不定  
天邊消息到何時  
洞庭旅鴈春歸盡  
瓜步寒潮夜落遲  
惆悵孤舟從此去  
江湖未敢定前期

和上官偉長蕪城晚眺

平蕪古堞暮蕭條  
歸思憑高黯未消  
京口寒烟鴉外滅  
歷陽秋色雁邊遙  
清江水落長疑雨  
暗浦風多欲上潮  
惆悵此時頻極目  
江南江北路迢迢

以上滄浪吟

嚴仁

仁字次山號樵溪邵武人有欵乃集

塞下曲

漠漠孤城落照間  
黃榆白葦滿關山  
千枝羌笛連雲起  
知是邊方牧馬還

詩林萬選

平遠樓

湘中病客思歸日  
城上高樓獨倚時  
半樹夕陽鴉集早

一江秋色雁來遲

詩家鼎鑪

嚴參

參字少魯自號三休居士與丹丘次山齊名世  
號三嚴

梅

衣染龍涎與麝臍裁雲剪月作冰肌小瓶雪水無多子  
只簦橫斜一兩枝

後村十家詩

看雪

天遠正難窮樓高不堪倚醉夢入江南楊花數千里

家詩

尚書

嚴肅

肅字伯復號鳳山

落花

片片落花飛隨風去不歸如何臨欲別不得傍君衣

詩家

昌黎

羅之紀

之紀字國張高安人嘉定中孝感尉

句

吾道非耶真可恥此君豈是折腰人

西江詩話之紀尉孝感攝邑雲夢上官不為禮之紀因雪壓竹賦詩云云遂棄官歸

蕭彥毓

彥毓號梅坡楊誠齋有句跋其詩卷云西昌有容學南昌蓋西昌人也

西湖雜咏

花心亭上坐滿眼是湖光只為便幽趣能來倚夕陽水  
邊春寺靜柳下小舟藏不待清明近鶯花已自忙

梁家渡

遠水環沙翠作灣  
紅塵飛不入青山  
涼風一枕秋宵夢  
夢繞千巖萬壑間

清明日早出太平門

江頭楊柳暗藏鴉  
江上鵝兒浴淺沙  
早起一風如此惡  
路旁落盡刺桐花

以上詩人玉屑

吳錡

錡字信可永福人  
鄱陽張世南與定交僅百日



而卒世南悲悼之錄其一詩

遊永福方廣巖

曾訪神仙巖洞來人言偉觀似天台  
藤蘿足下猿猱嘯鐘鼓聲邊日月開  
燈續佛光凝紫翠雲將蜃氣作樓臺  
最憐貫石神龍尾猶帶天東雨露回

游宦紀聞

胡時可

稼軒命賦滕王閣

滕王高閣臨江渚帝子不來春已暮  
鶯啼紅樹柳搖風

猶似當年舊歌舞

隨隱漫錄辛稼軒觴客滕王閣詩人胡時可通  
謁閣人辭焉呵詈愈甚辛使前曰既稱詩人先  
賦滕王閣有佳句則預坐即題首句衆大笑再  
書云云迺相與宴而厚賙之

彭止

止字應期崇安人自號漫者有刻鵲集

題辛稼軒齋中

棊子聲乾案接塵午窗詩夢煖於春清風不動堦前竹  
誰道今朝有故人

建寧府志彭止詩筆甚高嘗謁辛棄疾值其晝  
寢題一絕于齋而去稼軒覺遣人追之延留累  
月

左次魏

跋誠齋論高廟配享書稿後次伯子韻

鑒坡蓬監兩封書道院東西各付渠乾道聖人無固必  
是非付與直哉魚鶴林玉露

史文卿

文卿字景望鄞人

種梅

呼童耕雲種瑤樹斗挂青冥下風露隔林野鶴不知寒  
為我飛來復飛去

素與梅花自有緣又移幾本種庭前鏡中一半閒風月  
不屬王郎載雪船

秋詞

寫就秋詞雁影稀背燈無語獨眠遲畫闌點滴芭蕉雨  
一夜將愁向阿誰

枯梅

樛枝半著古苔痕萬斛寒香一點春  
總為古今吟不盡十分清瘦似詩人

以上前賢小集拾遺

黃洪

絕句

龍舟大半沒西湖此是先皇節儉圖  
三十六年安靜裏擢歌一曲在康衢

四朝聞見錄張巨濟字宏圖福清人嘉泰間上書寧宗以慈懿墳陵今在湖曲若陛下游幸則

未免張樂此豈履霜露之義寧皇感悟其言旋  
轉一秩由此湖山遂無清蹕之聲御鷁至沈于  
波臣非特儉德也黃洪詩云云武林舊事茂陵  
在御畧無游幸之事西湖離宮別館不復增修  
黃洪詩云云

### 余良弼


良弼順昌人

### 教子詩

白髮無憑吾老矣青春不再汝知乎年將弱冠非童子  
學不成名豈丈夫幸有明窗并淨几何勞鑿壁與編蒲

功成欲自殊頭角記取韓公訓阿符

萬姓統譜良弼子大雅與游敬仲同時從朱子  
游深得求放心之旨兩捧鄉書良弼有教子詩  
云云



宋詩紀事卷六十三

欽定四庫全書

集部

宋詩紀事卷六十五

詳校官監察御史<sub>臣</sub>李陽城

侍讀<sub>臣</sub>孫球覆勘

總校官進士<sub>臣</sub>繆琪

校對官中書<sub>臣</sub>牛稔文

謄錄監生<sub>臣</sub>任應銑



欽定四庫全書

宋詩紀事卷六十四

錢塘厲鶚撰

丁黼

黼字文伯號涎溪池州人寶慶初官成都制置使嘉熙三年北兵至力戰死之賜額立廟謚恭

愍

送錢尉入國

正是朔風吹雪初行旂結束問征途不能刺刺對婢子

已是昂昂真丈夫常惠舊曾隨屬國烏孫今亦病匈奴  
不知漢節歸何日準擬殷勤說汴都

益部談資

陳起

起字宗之錢塘人開書肆于睦親坊亦號陳道人  
寶慶初以詩禍為史彌遠所黥有芸居乙稿

瀛奎律髓寶慶初史彌遠廢立之際錢唐書肆  
陳起宗之能詩凡江湖詩人俱與之善刊江湖  
集以售劉潛夫南岳稿亦與焉宗之賦詩有云  
秋雨梧桐皇子府春風楊柳相公橋本改劉屏  
山句也或嫁秋雨春風句為教器之所作者  
併潛夫梅詩論列劈江湖集板二人皆坐罪而

宗之坐流配于是詔禁士大夫作詩紹定癸巳  
彌遠死詩禁解

### 秋懷

又見街頭賣紫萸老懷擾擾類催租  
客來喜得吳江紙欲寫新吟一字無

### 過三橋懷山堂

賣花聲裏憑闌處沽酒樓前對雨時  
景物如初情自老夕陽波上燕差池

### 挽許梅屋

桐陰吟社憶當年別後攀梅結數椽湖海有聲排逸韻  
弓旌不至歎遺賢兒收殘稿能傳業自誌平生不媿天  
航便雙魚無復得夾山西望淚潺湲

以上芸居乙案

夜過西湖

鵲巢猶挂三更月漁板驚回一片鷗吟得詩成無筆寫

蘸他春水盡船頭

梅磻詩話

鄭斯立

斯立字立之

贈陳宗之

昔人耽隱約屠酤身亦安矧伊叢古書枕藉于其間讀  
書博詩趣鬻書奉親歡君能有此樂冷淡世所難我本  
抱孤尚為貧試彈冠欲和南薰琴秋風歛戒寒恬無分  
外想賸有日晷閒閱書于市廛得君羈思寬誦其所為  
詩刻苦雕肺肝陶韋淡不俗郊島深以艱君勇欲兼之  
日夜吟辛酸京華聲利窟車馬如浪翻淡妝誰為容古  
曲誰為彈桐陰覆月色靜夜獨往還人皆掉臂過我自

刮眼看百年適志耳豈必身是官不見林和靖清名載

孤山

前賢小集拾遺

翁定

定字應叟建安人有瓜圃集

劉後村跋應叟尤工律詩送人去國之章有山人處士疎直之氣傷時聞警之作有忠臣孝子微婉之義感知懷友之什有俠客節士死生不相背負之意

送胡季昭竄象郡

應詔書聞便遠行廬陵不獨詫邦衡寸心祇恐孤天地

百口何期累弟兄世態浮雲多變換公朝初日盡清明  
危言在國為元氣君子從來豈願名

鶴林玉露李昭廬陵人寶慶初元為大理評事  
應詔上書言濟邸事竄象郡翁定諸人送行云  
云兄子建弟國賓皆懷奇負氣友愛最隆得罪  
之日橐無一錢于建挈家歸賣文以活國賓奮  
然徒步從其兄于貶所李昭歿詔許歸葬贈朝  
奉郎官其一子洪舜俞草贈官制詞云朕訪落  
伊始首下詔求讜直蓋與諫鼓謗木同意以直  
言求人而以直言罪之豈朕心哉爾風裁峭潔  
志概激壯辭尉廷平上書公車言人之所難言  
方嘉貫日之忠已墮偃月之計開塗胥口訪事  
瀧頭曾無幾微見于顏面何氣節之烈也仁祖  
能全介于遠謫之餘孝祖能拔銓于投荒之後

撫今懷往魂不可招潦霧墮鳶悲恸何及陟階  
員外仍官厥于用旌折檻之直且識投杼之過  
爾雖死可不朽矣

胡炎

炎寶慶初太學生

送胡李昭竄象郡

一封朝奏大明宮噓起廬陵古直風言路從來天樣闊  
蠻荒誰使徑旁通朝中競送長沙傳嶺表爭迎小澹翁  
學館諸生空飽飯臨分憂國意何窮

鶴林玉露



李昂英

昂英字俊明番禺人寶慶丙戌廷對第三淳祐  
初官吏部郎累擢龍圖閣待制吏部侍郎歸隱  
文溪卒謚忠簡有文溪集

久住白雲呈鎮長老

桑下戒三宿我此尚畱戀曹溪悟一夕我復無知見鎮  
公房遜客所須如執券園丁曉供茹行者時灌硯飯奴  
更芻馬紙帳費香篆主人真好事答應了無倦欲歸興

未闌坐享伊蒲饌

酌別張子元

并序

子元已注今年班籍去臘余以言職免歸子元不待  
引見毅然相隨南還茲再入京送之至鑒空閣下用  
東坡韻為別

南士如君幾妙處方寸境撐腸五十卷落筆擅三影喜  
談狂朱雲恥作諛谷永憂時點髭雪未月疎鑷鏡摩挲  
匣中龍起視斗牛耿每同畫灰語寒夜僮僕屏吾儕期

歲晏世俗任炎冷江亭揮別酒謔笑闌機警景文兄弟  
情畝異禾同穎日邊多便驛頻書來越嶺

景泰寺

樹合疑山盡攀緣有路通遠鴉追夕照低雁壓西風瀑  
勢雷虛壑松聲浪半空凭闌僧指似漲霧是城中

送舶使周甲

堂堂山立舊朝簪久屈清流督獻琛風送連艘出獅國  
浪吹殘句到雞林平生不隔同袍面中歲難禁惜別心

歸見耆英定相問祇言閉戶萬山深

以上文溪集

送湛師回華首寺

翩然拂袖忽然回帶得羅浮面目來乞食又還雙足爾  
坐禪豈是寸心灰故依華首從三靖旋摘茶芽供一杯  
蘭若苦空君不厭可能為我掃蒼苔

羅浮山志

洪夢炎

夢炎字李思號然齋淳安人寶慶二年進士歷

官武學博士出知衢州有集

高齋桂窟

植桂不在多種德如種樹前人能種後人傳自有清陰  
滿庭戶高枝凌雲低覆闌晴光翠色生晝寒人家多愛  
種桃李幾日春風紅滿地何如此花開獨遲蟾宮窟裏  
秋香細課兒讀書書滿牀更將幽興引壺觴半酣獨臥  
高齋下啼鳥數聲清晝長

淳安縣志

徐經孫

經孫字仲立初名子柔豐城人寶慶二年進士

累遷刑部侍郎太子詹事拜翰林學士知制誥  
忤賈似道罷歸閒居十年卒謚文惠有矩山存  
橐

病中有感

習嬾多成病旬餘久覆杯帳中聞燕語瓶裏看花開  
醫已肱三折愁來腸九迴何時得疎散屐齒印蒼苔

送太庾黎丞

客懷秋易惡送客更當秋薄宦相從久孤征暫畱酒

輕離思重目短大江流黃菊聊持贈寒香晚不差

福州即景

一別居諸歲月增遙聞此景畫難能潮田種稻重收穀  
石路逢人半是僧城裏三山千簇寺夜間雙塔百枝燈  
當年六月東山下地湧寒泉漱齒冰

以上矩山存橐

吳子良

子良字明輔臨海人寶慶二年進士官至湖南  
運使大府少卿有荆溪集

葵花

俗名一丈紅

花生初咫尺意思已尋丈一日復一日看看衆花上

全

芳備祖

馬光祖

光祖字華父金華人寶慶二年進士仕至寶章閣直學士沿江制置使江東安撫使知建康府拜知樞密院事以金紫光祿大夫致仕卒謚莊敏



汝南灣

當時只號汝南灣後有三人住此間自謂逸民須隱約  
並稱賢士想高閒祇緣水味都殊異且欲鄰居數往還  
好事有時相就飲不妨鐺腳劉青山

焦氏筆乘汝南灣當秦淮曲折處齊陸慧曉清  
介自立家于灣前張融牽船住岸卜鄰以居劉  
獄及弟璉二人并居其間水有異味時共酌飲  
之馬制使光祖有詩

翁甫

甫字景山崇安人寶慶二年進士累官江西轉

運使改知泉州有浩堂類橐

九日

秋風兩度身為客已見重陽未到家村酒不堪供節事

祇將青眼看黃花

全芳備祖

程元鳳

元鳳字申甫歙人紹定二年進士累遷參知政  
事拜右丞相兼樞密院使罷充醴泉觀使度宗  
即位拜少傅右丞相進封吉國公致仕卒謚文

清

明堂大禮慶成詩

聖心翼翼對蒼穹歲事明禋協肅雍玉輅曉升香霧涵  
紫壇夜款瑞烟濃風聲應律諧簫管月色澄空映璧琮  
丹鳳樓前恩施溥歡呼三祝效堯封

森嚴羽衛擁和鑒咫尺龍顏侍至尊禋祀儀文勤聖問  
敬天實意進芻言百神受職來鴻祉多士承休肅駿奔  
右饗不常威可畏載歌周頌報皇恩

寶祐五年史院修高孝光寧四朝國史成上進九月明堂升侑高宗禮成進詩三章稱賀

聖主嚴恭德意真兩儀合饗鑒精純九筵五室儀章舊  
一祖三宗侑典新風日盎溫鑒輅駕月星明概玉卮陳  
元良式獻邦家慶共祝吾皇壽萬春

格天盛德素躬全肸鬻交通心即天供幣用將祈永命  
奉粢端為告豐年寬條日布民安業捷幟星馳將護邊  
虎拜紫宸稱賀處祥光縈繞御爐烟

愚臣何幸際明時才本疎庸玷宰司未報聖恩懷夕惕  
更叨使領侍親祠駿奔重屋儀文肅雞揭端門惠術施  
歸美慚微天保頌畏威願繼我將詩

以上明良慶會錄

### 李曾伯

曾伯字長孺潭懷人居嘉興理宗朝歷官四川  
宣撫使賜同進士出身為湖南安撫使進觀文  
殿學士又知慶元府兼沿海制置使有可齋類  
稿

題二水光華軒

歷歷湖南道駸駸嶺右州  
感時僧解夏觸事客驚秋  
雨洗流金虐風生落木愁  
一萍如寄耳往夢付悠悠

寧廟挽詞

德化勤三紀仁聲溢九州  
澣衣昭禹儉畀食軫文憂  
潤色恢鴻業艱難啟燕謀  
中興宗漢廟端自敬天休  
自聽山東詔甘泉息夜煙  
璽膺新玉帛圖貢舊山川  
望切堯民日憂形祀國天  
中原尤感泣不獨老臣然

利州登棧道

足跡初來劒北州，試登危棧瞰江流。  
萬山西接地窮處，一水東歸天盡頭。  
欲訪轂函無健馬，相忘楚漢付輕鷗。  
丈夫要了中原事，未分持竿老釣舟。

偶得希真巖壑舊隱正在小圃因賦

數峯佳致藹前修，心匠玲瓏小更幽。  
公去我來幾傳舍，人非物是一虛舟。  
矗天柳色新條改，垂地藤陰舊迹留。  
坐對黃花誰領會，猶疑胡蝶是莊周。

以上可齋類稿

厲文翁

文翁字聖錫號小山居士東陽人唐詩人御史  
元之後父少保模理宗朝以郊恩入仕累官權  
戶部尚書端明殿學士兩浙制置使兼知臨安  
府封東陽郡開國侯

庭竹

渭川未暇栽千畝庭檻聊須種數根最愛深秋羣木脫  
獨欺風雨戰黃昏

全芳備祖



句

暮雲春雪江南北回首人生歎路歧

梅

且喜臥龍常自

在新詩特地報平安

松

全芳備祖

岳珂

珂字肅之號亦齋又號倦翁忠武王孫敷文閣  
待制霖子管内勸農使知嘉興歷官戶部侍郎  
淮東總領有玉楮集

無題

秋水芙蓉試早妝  
半軒微雨灑鴛鴦  
細腰正欠酬金餅  
奮翼何堪卸玉梁  
髮鬢釵橫人在牖  
繩低斗轉月侵牀  
無情花影雲來去  
都作一天風露涼

試廬陵賀發竹絲筆

此君素以直節名  
延風揖月標韻清  
何人心匠出天巧  
縷析毫分勻且輕  
居然束縛復其始  
即墨紆朱封管城  
世門官爵豈必計  
且幸一家同汗青

九月十三日始就郊墅拜寶謨閣直學士提舉江

州太平興國宮之命

槐影西清舞翠鸞竹宮高接五雲環  
職陪溫洛圖書地名在元封卜祝間  
晝訪未承龍閣問晨香猶廁羽衣班  
祠官到處無公事且聽松聲老此山

以上五楮集

鶴林寺

秋枕竹鳴屋晝暮松掩關雨晴猶溼徑  
雲薄不藏山未洗中原恨誰消永日閒  
西風動征隰空婉鬢毛斑

鶴林寺志

董太初

保應廟

在新昌縣十四都隋諸王避難歿葬其地水旱疾疫祈禱輒應寶慶二年從鄉民之

請建廟賜額

廟食空山八百年衣冠猶是李唐前汴河十里垂楊柳

何似松陰數畝田

紹興府志

顏頤仲

頤仲字景正龍溪人煥章閣學士師魯孫以祖

蔭補官累擢吏部尚書寶章閣學士提舉玉隆

宮卒

柳

柳漸成陰萬縷斜舞腰柔弱弄韶華一庭春色無人管

簷雨聲中飛盡花

廣羣芳譜

祝穆

穆字和父曾祖確歛之名士于朱文公為外祖

父康國始從文公居崇安穆少與弟舉同事文

公于雲谷得其緒論嘗著事文類聚方輿勝覽

行世

山礬花

玲瓏葉底雪花寒  
清晝香熏草木閒  
移植小軒供宴坐  
恍疑身在普陀山

全芳備祖

楊棟

棟字元極  
青城人  
紹定二年進士  
度宗朝官同  
知樞密院事  
參知政事  
出知慶元府  
卒有平舟  
集

淨土寺追和東坡韻

在臨安吳越王建

令君督來期書郵日旁午世事不足論清游乃先務朝  
朝叩禪關復此得淨宇淺斟琥珀濃細嚼銀絲縷味雋  
問牛酥軒高來燕乳曲折溪屢橫尖圓峯可數萬頃喧  
桑田一簇靜松塢由來鏡中人不殊草頭露越主朝汴  
宮蜀客盡吳語剝蝕淨土碑荒殘峽山路桑梓如之何  
誰能忘一顧日詢錦橋新三歎清流俯

咸淳臨安志

## 蔡抗

抗字仲節號九軒處士元定孫沈之子也紹定

二年進士累官擢吏部尚書端明殿學士同知樞密院事拜參知政事以忤時相落職奉祠卒  
謚文簡改文肅

大隱屏

脫畧塵世慮仙巖共夷猶乘源得風便快楫行扁舟神  
仙現竒怪古木橫巖陬振衣萬仞高天風動衣裾巍巍  
隱屏峯擎天峙中流良朋論心事感慨悲新秋浩歎復  
浩歌一飲還一酬南陽豈終臥東山諒同憂斟酌素有



定今焉試為籌西方起暝色歸袂不可畱去去惜離別

後會良悠悠

武夷山志

陳松龍

松龍字應初號三嶼閩縣人紹定二年進士仕  
為京口倅大理司直

茶蘼

布葉叢條翠作團自生芒刺護裳衣莫嫌野興難拘束  
祇伴春風亦見幾

全芳備祖

曾原一

原一字子實號蒼山贑州寧都人領鄉薦紹定中與戴石屏結江湖吟社

賦楊妃韞

七歲作

萬騎西行駐馬嵬  
凌波曾此墮塵埃  
誰知一掬香羅小  
踏轉開元宇宙來

梅磴詩話

鄭會

會字有極號亦山

江亭夜坐呈曾蒼山

江梅欺雪樹槎牙  
梅片飄零雪片斜  
夜半和風到窗紙  
不知是雪是梅花

詩林萬選

游金精山

春風棧閣曉雲寒  
中有潺潺玉一灣  
白石碁盤青石磴  
鮮花猶帶漢時斑

金精風月

題邱閒壁

餘醺香夢怯春寒  
翠掩重門燕子閒  
敲斷玉釵紅燭冷

計程應說到常山

宋藝圃集

陳夢庚

夢庚字景長閩人紹定中廣西路漕幕

大隱屏

大隱屏前風月閒何人手種萬琅玕深深五曲東流水  
合作十年洙泗看

武夷詩集

徐元杰

元杰字仁伯信州上饒人紹定五年進士第一

歷著作佐郎兼兵部郎官進太常少卿兼給事  
中國子祭酒卒謚忠愍

湖上

花開紅樹亂鶯啼草長平湖白鷺飛風物晴和人意好  
夕陽簫鼓幾船歸

西溪叢話

孫子秀

子秀字元實餘姚人紹定五年進士開慶初歷  
提點兩浙刑獄除太常少卿兼知臨安府

游丹山

四明洞天居第九巨靈擘石開窗牖捫蘿陟嶽不憚勞  
同行況遇忘年友老苔護石蒼虎閒飛瀑懸崖玉龍吼  
豁然人與境俱勝未必醉翁真在酒徘徊步月醉忘歸  
世事浮雲竟何有

姚江逸詩

朱繼芳

繼芳字李實建安人紹定五年進士有靜佳乙

橐

登眺

破帽任風吹  
天知鬢已絲  
大江流禹蹟  
老樹見秦時  
北際山如礪  
南溟水似池  
夜涼無夢到  
久矣歎吾衰

江湖偉觀

葛嶺壽星院上有閣曰江湖偉觀安撫趙與憲建

吳山表裏水為池  
百有餘年壯帝畿  
天目舊將雙鳳下  
海門新拱六龍飛  
胥濤白雪生秋思  
太乙紅雲駐夕暉  
江上沙鷗湖上舫  
柳絲風裏兩依依

次韻野水花朝之集

睡起名園百舌嬌  
一年春事說今朝  
鞦韆庭院紅三徑  
舴艋池塘綠半腰  
苔色染青吟屐蠟  
花風吹暖弊裘貂  
主人自欠西湖債  
管領風光是客邀

吳歌

雁影江潭底  
秋聲浦溆間  
吳兒歌一曲  
月子幾回彎

揚州

金陵王氣水東流  
流到淮南古岸頭  
夜半一聲天上曲  
錦帆天子下揚州



用前韻謝野水郎君招飲

為有池臺無限嬌遊人歌舞尚朝朝  
清漪浴日開金面  
晴暝調風袞綠腰  
騷客五花唐殿馬  
主家七葉漢庭貂  
丁寧紅紫休開徧  
約住春風待見邀

題李秋堂盟鷗集

相逢已恨十年遲  
買酒吳山一夜時  
明日送春仍送客  
柳花風颺鬢邊絲

辛亥二月望祭齋宮因遊甘園

朝霏作雨連天溼花氣熏人到骨香四望水亭無正面  
有花多處背湖光

老眼看花興未厭不知頭上雨廉纖流鶯浪語東風恨  
誰拗花枝插帽檐

滄浪風月

我登滄浪亭復歌滄浪曲歌竟復長歌杳杳山水綠天  
風吹散髮山月照濯足為謝獨醒人漁家酒初熟

以上  
靜佳

乙案

靈芝寺

黄金市地小橋通四面清平納遠空雲氣長扶天子座  
日光浮動梵王宮殘碑幾字莓苔雨疎磬一聲楊柳風  
沙鳥不知行樂事背人飛過夕陽東

武林舊事寺在湧金門外錢王故苑芝生其間  
捨以為寺高宗孝宗凡四臨幸朱靜佳有詩

六言

柳下白頭釣叟不知生長何年前度君王遊幸賣魚收  
得金錢

武林舊事淳熙間壽皇以天下養每奉德壽三  
殿游幸湖山凡游觀買賣皆無所禁小舟時有  
宣喚賜予如宋五嫂魚羹嘗經御賞人所共趨  
遂成富媼朱靜佳六言詩云云往往修舊京金  
明池故事以安太上之心豈特事遊觀之美哉

薛師傳

師傳鄞人紹定五年進士有雪蓑集

六橋閒步

出郭青岑近臨流白鳥飛笙歌春雨歇草樹夕陽微山  
色邀藜杖湖風颭葛衣虛舟林處士不見鶴來歸

甫上  
者舊

集

俞桂

桂字希邨仁和人紹定五年進士有漁溪詩藁

過湖

舟移別岸水紋開日暝風香正落梅山色濛濛橫畫軸

白鷗飛處帶詩來

虎丘

突兀浮圖插翠微吳王事迹總成非寺僧未晚山門閉

不放閒雲一片飛

松江送人

西風蕭瑟入船窗送客離愁酒滿缸好記此時分袂處

暮烟微雨過松江

以上漁溪詩彙

方岳

岳字巨山號秋崖祁門人紹定五年進士兩為

文學掌故官中祕書出守袁州有秋崖先生小

彙

泊歙浦

此路難為別丹楓似去年人行秋色裏雁落客愁邊霜  
月敲寒渚江聲驚夜船孤城吹角處獨立渺風烟

約黃成之觀瓊花予不及從以詩代簡

杜宇聲中鬢欲華春風將綠又天涯欠隨江夏無雙士  
共看揚州第一花想像烟雲人跨鶴淋漓詩句字棲鴉  
蹇驢不管唐衫溼醉兀歸鞍暮雨斜

立春都堂受誓祭九宮壇

輦路春融雪未乾  
雞人初唱五更寒  
瓊幡第一番花信  
吹上東皇太一壇

湖上

沙暖鴛鴦傍柳眠  
春來亦嬾避湖船  
佳人窈窕惜顏色  
自照晴波整翠鈿

今歲春風特地寒  
百花無賴已催殘  
馬塍曉雨如塵細  
處處筠籃賣牡丹

綠波如畫雨初晴  
一岸烟蕪極望平  
日暮落花風欲定



小樓弦管壓新聲

游人抵死惜春韶  
風暖花香酒未消  
須向先賢堂上去  
畫船無數泊長橋

清明日舟次吳門

篷窗恰受夕陽明  
楊柳梨花半月程  
老去不知寒食近  
一篙烟水載春行

趙昭儀春浴

紅薇滴露護輕寒  
微髻香絲卸玉鸞  
祗道春風庭院祕

外間已作畫圖看

以上秋崖小稿

陸 輅

輅字景思號雲西會稽人佃五世孫紹定五年  
進士官禮部員外崇政殿說書謝臯羽編天地  
間集列于文謝諸公後

絕句

采藥人歸聞木氣尋仙路遠夢桃花買來山釀全如水  
亦解昏昏到日斜

野槿扶疎當縛籬山深不用掩山扉客來踏破松梢月  
鶴向主人頭上飛

全芳備祖

### 退宮人

破篋猶存舊賜香輕將魂夢別昭陽祇知鏡裏春難駐  
誰道人間夜更長父母家貧容不得君王恩重死難忘  
東風二月垂楊柳猶禁飛花入苑牆

天地間集

### 湯巾

巾字仲能安仁人官制幹

以廬山三疊泉寄張宗瑞

九疊峯頭一道泉分明來處與雲連  
幾人競賞飛流勝今日方知至味全  
鴻漸但嘗唐代水涪翁不到紹熙年  
從茲康谷宜居二試問真巖老詠仙

游宦紀聞廬山三疊泉于紹熙辛亥歲始為世人所見從來未有以淪茗者紹定癸巳湯制幹仲能主白鹿教席始品題以為不讓谷簾寄張宗瑞云云

張輯

輯字宗瑞履信之子馮深居目為東仙有欵乃

集

朱湛盧序其詞云東澤得詩法于姜堯章世所傳歟乃集皆以為米石月下謫仙復作不知其又能詞也

次湯制幹寄三疊泉韻

寒碧朋尊勝酒泉松聲遠壑憶畱連詩于水晶進三疊  
名與谷簾真兩全畫壁烟霞醒昨夢茶經日月著新年  
山靈似語湯夫子恨殺屏風李謫仙

游宦紀聞紹定癸巳湯制幹仲能主白鹿教席始品題三疊以為不讓谷簾常以詩寄二泉張

廣之云云九疊屏風之下舊有太白書室

蕭 翦

翦字則山號大山臨江人紹定進士以太府丞

奉祠

贈陸冰詩

標格真清映雪霜每聽新語覺神傷  
茶分鴻漸經中味菊愛龜蒙賦裏香  
圃積玉多知學飽囊裝金少為貧忙  
向來笑疾難醫在老筆空抄十卷方

梅磳詩話純用陸姓事與東坡贈張子野詩頗相類鴻漸龜蒙的對

### 荻芽

江客因貧識荻芽一清塵退雜魚蝦燒成味挾濠邊雨  
掘得身離雁外沙春饌且供行釜菜秋江莫管釣船花  
食根思到蕭騷葉痛感邊聲咽戍笳

### 荔子

選荔過于選士難味佳能有幾登盤林家新出金釵子  
合入君謨譜後看

句

雨過亂蓑堆野艇月明長笛和菱歌

以上全芳備祖

章謙亨

謙亨湖州人紹定中鉛山令

淨惠院

淨惠荒涼寺平林淺阜間殿存碧支佛門對赭亭山遶

屋竹陰翠沿階苔暈斑雨中來託宿卻羨白鷗閑

廣信府志

安如山



如山字汝止廣漢人善擊劒左右射讀經史百  
氏之書端平甲午安撫曹友聞辟掌書記不起  
友聞戰死如山往收其骨藏諸其先人之側乃  
東下老于會稽

曹將軍

將軍精悍姿齒齒碎鐵石在昔童稚中但聞飽經術縱  
橫騁柔翰丹雘間金碧有司塞明詔敝邑屈詞伯芹香  
春水生冠玉侍重席脫畧章句陋搜挾窮理窟未及文

化成其如王土窄丈夫報主願豈必蒙清秩蒼皇請去  
位滿面秋栗烈糾合熊虎羣旆旆揚廣陌正當摩厲間  
一鼓拔勅敵屯兵沔水源千里斧戡戡浩蕩排烟旻西  
極安岷嶲奈何國無人腐儒秉旄鉞賞予入私門金湯  
授盜賊公時奮臂爭反遭獻玉則三軍視馬首慟哭下  
天壁功成坐齟齬憤怒鬚插戟中宵拔劒起肅肅整勁  
翻吐氣風雲生塞旗陷堅列貫穿死生地喋血天地黑  
勢雖衆寡懸形未雌雄決路窮斷首尾衆盡乃手格豈

知龍虎逝黯淡山川色百萬尚震驚嗚呼死諸葛長城  
但自壞千古痛稠結肉食無遠謀野史有直筆酒酣歌  
節士鼎鼎霜月白

下瞿塘

去去如奔馬來來無盡船人心似江水日夜向吳天

以上

谷音

黎 宙

宙號月潭

游金精山

不到金精久山空花自香  
殿梁唐歲月石鼓漢文章  
洞杳多雲氣崖高易夕陽  
酌泉消世慮吾亦正徜徉

金精  
風月

宋詩紀事卷六十四